

二篇同卷

如九

三十六水法
巨勝歌

三十六水法

礬石水

取礬石一斤無膽而馬齒者納青竹筒中薄削筒表以硝石四兩覆薦上下深固其口納華池中三十日成水以華池和塗鐵鐵即如銅取自治鐵精內中成水

又法

取礬石三斤置生竹筒中薄削其表以紬綿纏筒口埋之濕地四五日成水

又法

先以溲醢浸礬石浥浥乃盛之用硝石二兩漆固口埋地中深三尺十五日成水

雄黃水

取雄黃一斤納生竹筒中硝石四兩漆固口如上納華池中三十日成水

又法

用硝石二兩以甌瓶盛苦酒納筒中密蓋埋中庭入土三尺二十日成水其味甘美色黃濁也

雌黃水

取雌黃一斤納生竹筒中加硝石四兩漆固口如上納華池中三十日成水

又法

加礬石硝石各二兩以甌瓶盛埋地中二十日成水其味甘色黃

丹砂水

以丹砂一斤納生竹筒中加石膽二兩硝石四兩漆固口如上納華池中三十日成水

又法

石膽硝石各二兩甌瓶盛埋如上三十日成水味苦色赤

曾青水

取曾青一斤納生竹筒中加硝石四兩漆二兩漆固口如上納華池中三十日成水

又法

用硝石二兩甌瓶盛埋如上三十日成水

白青水

取白青一斤兔血一合並安竹筒中納苦酒中五十日成水

又法

加硝石二兩甌瓶盛埋如上法三十日成水其味酸而色青

礬石水

取礬石一斤丹砂二斤硝石一斤納竹筒中漆固口如上納華池中百日成水

又法

以雲英水溲令浥浥加硝石二兩以甌瓶盛埋如上三十日成水味辛其色青黑

磁石水

取磁石一斤雄黃一兩石膽一兩合搗納竹筒中漆固口如上納華池中三十日成水

硫黃水

取硫黃一斤八月桑上露一升硝石二兩納竹筒中漆固口如上納華池中三十日成水

又法

先以漆添硫黃澁令泥泥納竹筒中加硝石二兩如上法埋地中十五日成水名曰包天之石

硝石水

取硝石搗篩鹽漬令泥泥納竹筒中密固口埋地中四尺四寸五日成水

又法

硝石三斤納生竹筒中薄削竹纏約口埋濕地四尺五日成水

又法

治硝石以上龍血澁之令泥泥納竹筒中漆固口埋地中三尺十五日成水味苦名陽灼

白石英水

取白石英一斤鶴子血一升硝石四兩合納筒中漆固口納華池中三十日成水

紫石英水

取紫石英一斤納竹筒中加硝石四兩漆固口如上法納華池中四十日成水

赤石脂水

取赤石脂一斤烏犬血一升和之加硝石四

兩納筒中漆固口如上法納華池中三十日成水

玄石脂水

取玄石脂一斤硝石四兩合納筒中漆固口如上埋入地五尺三十日成水

綠石英水

取綠石英一斤曾青一兩丹砂二兩合納竹筒中納華池中百日成水

石桂英水

取石桂英一斤生薑汁一升合納竹筒中訖納華池中十日成水

石硫丹水

取石硫丹一斤磁石一斤合搗納竹筒中埋之十日十夜成水

紫賀石水

以紫賀石一斤麻汁一升合澁納銅器中十日成水

華石水

取華石一斤丹砂二兩合納竹筒中埋入地一丈十日成水

寒水石水

以寒水石一斤石膽一兩合納竹筒中煮之一日成水也

凝水石水

以凝水石一斤青鳧血一合搗納竹筒中埋濕地入三尺十日成水

冷石水

以冷石一斤伏翼矢一升合搗納竹筒中埋之百日成水

滑石水

以滑石一斤雲母一升戎鹽一升合納竹筒中埋之十日成水

黃耳石水

以黃耳石一斤八月百草上露一升合納竹筒中漬苦酒中百日成水

九子石水

以九子石一斤摻汁一升合搗納銅器中停之十日成水

理石水

以理石一斤竹瀝一升合納竹筒中漆固口

埋入地五尺三十日成水

又法

治理石以淳醋澄令泥泥土金盛炭火熬三日而赤治之納竹筒中率一介加硝石二兩漆固口埋地中深三尺二十日成水

石腦水

石腦一斤硫黃一斤合搗納竹筒中埋之十日成水

雲母水

取熟接雲母粉一斤鹽水二兩硝石水一兩攪澄令泥泥納竹筒中埋入地五尺二十日成水

又法

治雲母粉以桂水或鹽水分等澄令泥泥納竹筒中率加硝石二兩漆固口如上法埋地中深三尺并空井无水者蓋之二十五日成水盛以銅器置濕地名曰雲英液以凝化石九英

黃金水

以金一斤綠礬二斤納生竹筒中漆固口納

華池中五十日成水

白銀水

以白銀一斤麥醬清二升淳酒二升赤黍杜荆酒一升合納竹筒中漆固口如法納華池中三十日成水

鉛錫水

削鉛二斤相和硝石四兩合納筒中漆固口如法納華池中百日成水

玉粉水

玉粉一斤芍藥灰一升白犬血一升蟾蜍十枚搗絞取汁合搗納竹筒中漆固口如法納華池中三十日成水

又法

取白玉如猪肪者以蟾蜍汁塗之即消潤如餌即粉解治之以棠梨實屑粉蟾蜍一日一夜化為水

取土龍汁和雲母水以漆玉粉令泥泥銅銚盛之一宿化成水名曰玉漿

漆水

漆一升大宿蟹十八枚覆之五十日成水

又水

取淳漆一斤置銅器中以大宿蟹十八枚納漆中一宿化成水復以雲母粉一斤納漆中一宿化成水復取白玉屑粉三斤納漆中三日化成水名曰神漿以藥汁即微視神明光于四海无所不通

桂水

粉桂一斤葱涕三升合納竹筒中蒸之三日三夜成水

又法

治桂屑以白葱汁澄泥復以山中露水若雨雪及千里流水皆可以澄雲母桂令溫置生竹筒中率一斤加硝石二兩塞甑中蒸之三日三夜即化為水名曰木石得

鹽水法

治下篩鹽以水澄之令泥泥薄削筒令盛之重密塞其口埋入地四尺四寸以水濕其上四日成水

右三十六水法古本省要易可遵用而諸石中亦有非世所識丹藥不盡須之者其

朱點頭十五種是後薦之限石名既同所以合此也

石膽水

治石膽一斤澆以淳醋浥浥納竹筒中硝石二兩覆薦之漆固其口以甌瓶盛醋納竹筒於中埋入地深三尺十五日成水名曰雲梁石洩

銅青水

治銅青澆以五洩水澆令浥浥納竹筒中一斤加硝石二兩漆固口埋之如上法十五日成水取蒸消之名華龍沙狀若青碧一名雲英洩

戎鹽水

治戎鹽一斤澆以土龍汁浥浥納竹筒中一斤加硝石三兩漆固口埋地中深三尺十五日成水

鹵鹹水

治鹵鹹澆以淳酒令浥浥納鐵器中炭火上熬之三日三夜赤出治之納竹筒中一斤加硝石二兩漆固口埋地中入三尺十五日成

水名曰金溜液

鐵華水

取鐵華治之以雲英鹽水澆令浥浥納竹筒中一斤加硝石二兩漆固口納甌瓶醋中埋入地三尺四十五日成水名曰玄靈金慈洩水可以仙

鉛缸水

以五勺蜚霜雪以合金翁華粉澆以雲英鹽水令浥浥納竹筒中一斤硝石二兩漆固口置甌瓶醋中埋入地三尺以馬通火煨之三十日成水

缸水

治積雪澆以黃輕水銀令浥浥率一斤缸粉用水銀三兩納竹筒中漆固口置甌瓶醋中埋入地三尺馬通火煨三十日成水名曰流靜深遠處按此方合萬无不成也

高起曰當先投漬酒五石於所止流水之中若地無流水當作井如上投酒於井中以鎮地氣令學者皆飲食此水也發火贏火也頓火之者令糠火至際一寸也傳授神經皆約

齋盟用金魚一兩玉龍銀鏤以代剪髮歃血之誓今世無此物又不可虛涉乖儀令謹撫青布四十尺以唯金魚之信帛綃四十尺以承銀環玉龍之約並奉有經之師師當將散施山栖之客不得自割以為身用所以明天約也永無私矣違盟則四極有法也

作丹忌日

春戊辰夏丁巳戊申巳巳未辰秋戊戌巳亥辛亥庚子冬戊寅巳卯癸酉未戌及壬丙戌丁亥土戊癸辛巳日建日殺反支无季孟仲季月收閉晦朔上朔八魁往亡留後日皆凶作藥不成矣作六一泥亦須擇日即吉

三十六水法